

Sakspapir

Saksnr	Utvalg	Type	Dato
031/22	Formannskapet	PS	24.03.2022

Saksbehandler	Arkiv	ArkivsakID
Asbjørn Nagell Toft	Plannavn-Klima- og energiplan, Komnr-4632, FE-144	21/240

Kommunedelplan for klima- og energi for Austrheim kommune 2022-2032

Vedlegg:

Kommunedelplan for klima og energi for Austrheim kommune 2022-2032

Statsforvaltaren - Uttale - temaplan for klima og energi

Austrheim kommune - Tilsagn - om tilskot til kommunale klima- og energiplan

Innspel til klimaplan 2021 for Austrheim

Oppstart av Temaplan for klima og energi for Austrheim kommune

Framlegg til vedtak:

Formannskapet legg Kommunedelplan for klima og energi for Austrheim kommune 2022-2032 ut på offentlig ettersyn. Grunngevinga er gjeve i saksutgreiinga. Vedtaket er heimla i plan- og bygningslova si § 11-14.

Formannskapet - 031/22 - 24.03.2022

FS - behandling:

Avdelingsleiar plan Asbjørn Toft orienterte om saka, og sa at den største utfordringa for Austrheim er å redusera klimautsleppa.

Handsaming i formannskapet:

Kommunedirektøren sitt framlegg vert samrøystes vedteke

FS vedtak:

Formannskapet legg Kommunedelplan for klima og energi for Austrheim kommune 2022-2032 ut på offentlig ettersyn. Grunngevinga er gjeve i saksutgreiinga. Vedtaket er heimla i plan- og bygningslova si § 11-14.

Saksopplysninger:

Formannskapet vedtok den 18.03.2021 (sak 030/21) oppstart av planarbeid for plan for klima og energi for Austrheim kommune. Austrheim kommune fekk etter søknad **kr. 100.000** i tilskot av Vestland fylkeskommune til dette planarbeidet, dette løvingsbrevet er datert den 07.06.2021.

No er **Kommunedelplan for klima og energi for Austrheim kommune 2022-2032 med handlingsprogram** klar til å sendast ut på offentleg ettersyn. Denne planen skal vera eit verkty for at Austrheim kommune skal nå internasjonale, nasjonale, regionale og lokale klimamål. Firmaet Sweco AS vart hyra inn for å bistå kommunen med dette planarbeidet. Arbeidsgruppa for dette arbeidet i Austrheim kommune har vore ordførar Per Lerøy, plansjef Asbjørn Nagell Toft og avdelingsleiar på teknisk Rolf Henning Myrmel, dei har involvert andre fagpersonar og leiarar i kommunen i arbeidet.

Kommunedirektøren og dei tre kommunalsjefane innafor sine område har det overordna ansvaret for gjennomføring av tiltak etter denne kommunedelplanen. Når planen vert godkjent vert det naturleg å drøfta prioritering av tiltak i kommunedelplanen saman med kommunestyret, ut frå kostnader og tilskotsordningar. Alle relevante sektorar kommunen må ta del i omstillinga. Økonomien kommunen framover som var på ROBEK-lista fram til 2021 spelar og inn her.

Den første **Klima- og energiplanen for Austrheim kommune** vart godkjent i 2011.

Planoppstarten vart annonsert på vanleg måte i lokalavis og heimeside, offentlege instansar og lag/foreningar vart tilskrivne. Innspelfrist vart satt til 18. mai 2021. Det kom innspel frå følgjande aktørar (innspela er vedlagt i saka):

1.Eldrerådet i Austrheim kommune kom med dette innspelet frå møte datert den 15.04.2021:
Eldrerådet ber om at det vert fortgang i planane om å fornya pumpestasjonen i Åråsvågen, for å sikra at dette miljøproblemet vert teke hand om. Om dette problemet hadde blitt løyst, kan det bli ein fin badeplass sentralt i kommunen.

Austrheim kommune sin kommentar: Utbygginga av ny pumpestasjon i Åråsvågen skal starta våren 2022. Då vil vasskvaliteten i Åråsvågen verta betre. Den nye stasjonen vil vera viktig for å få eit reinare miljø i våre vassdrag. Såleis er dette eit viktig klimatilpassingstiltak då det fører til mindre avrenning av næringstoff til våre vassdrag og sjøområde.

2.Vestland fylkeskommune kom med dette innspelet datert den 18.05.2021 (forkorta):
Klimautfordringane er ein av dei største utfordringane menneskeheita har stått ovanfor. Planen bør definere generelt mål knytt til korleis kommunen skal jobbe med miljømessig berekraft, og kva rolle kommunen skal ta i arbeidet med klimaomstilling av samfunnet. Dette inkluderer både ambisiøse mål for utsleppsreduksjon og korleis kommunen skal jobbe for å sikre kommunesamfunnet frå klimaendringane. Førre-var-prinsippet ligg her til grunn.

Vi oppmodar dykk også til å vurdere kvar klimarisiko kommunen kan vere utsett for, både fysisk og økonomisk. Arealbruk og økosystem som er viktige for klimatilpassing bør kartleggast for å kunne gjere prioriteringar. Områder som våtmark, elvebreidder og skog kan dempe effekten av klimaendringar, og dette må ivaretakast inn i arealplanlegginga. Planen bør inkludere klimatilpassing ut over det som går på samfunnsikkerheit. Naturbaserte løysingar er viktig her.

Vestland fylkeskommune har i utviklingsplanen sett mål om nullutslepp innan 2030. Fylkeskommunen treng alle kommunar med på laget for å nå dette målet, og håpar at Austrheim kommune ynskjer å vere med på dette. Uavhengig om dei indirekte utsleppa er inkludert i målet om utsleppsreduksjon, bør planen ta føre seg forbruksbaserte utslepp. Ved planlegging i tett bebygde områder vil det vere spesielt aktuelt å nytte alternative energikjelder som fjordvarme eller fjernvarme.

I arbeidet med berekraft skal vi ta omsyn til både miljømessig, sosial og økonomisk berekraft. Tiltaka for å lukkast med klimaomstilling skal ikkje gå ut over innbyggjarane og kommunesamfunnet på ein

urettferdig måte. Eit døme på dette kan vere bygging av sykkelveg, som ofte blir gjort som eit tiltak for å redusere utslepp. Folkehelse og tryggleik må og vera tema i planen. I tillegg er det sosiale, med møteplassar, friluftsliv og tilgang på natur viktig innan folkehelse og bør koplust til klimaarbeidet.

Fylkeskommunen kom og inn på klimarekneskap og klimabudsjett i innspelet sitt. Klimaomstilling er eit leiaransvar. For å nå klima- og miljømåla kan det offentlege bidra gjennom innkjøp. Kommunen er ein stor innkjøparar, og kan på denne måte etterlyse varer og tenester som tek omsyn til klimautfordringane. Kvar krone kommunen nyttar kan påverke klimafotavtrykket til kommunen.

Austrheim kommune sin kommentar: Austrheim kommune har i stor grad teke med innspela frå Vestland fylkeskommune til følgje i dette planarbeidet. Økonomiske ressursar har gjort at klimabudsjett/klimarekneskap ikkje er laga. Det viktigaste no er handling for å redusera klimagassutsleppa og aktivt tilpassa oss klimaendringane så fort og godt som me kan. Kommunestyret sitt vedtak den 11.11.2021 om klimamål følgde opp fylkeskommunen sine målsetjingar på ein klar måte. Kommunedirektøren og dei tre kommunalsjefane innafor sine område er ansvarleg for gjennomføring av tiltak etter denne kommunedelplanen. Statlege tilskotsordningar og initiativ infor dette arbeidet vil uansett Austrheim kommune følgja aktivt opp framover. Miljøsertifiseringa av Austrheim kommune som starta i 2021 og som pågår vil og vera styrande for prioriteringar av tiltak framover. Kommunen vil ha ein praktisk tilnærming til dette viktige arbeidet. Austrheim kommune tek elles innspelet til orientering.

3.Statsforvaltaren i Vestland kom med dette innspelet datert den 24.06.2022 (forkorta):

Kommunen må leggje FN sine berekraftsmål til grunn for planen. Statlege planretningslinjer for klima-energi og klimatilpassing er det mest sentrale dokumentet når det gjeld nasjonale føringar for klimaarbeidet. Det er viktig at arbeidet med planen vert tverrfagleg, og at ein sikrar medverknad frå alle aktuelle etatar og aktørar i kommunen. Ansvar for arbeidet med planen bør difor vere forankra sentralt både i politisk og administrativ leiing. Vidare rår vi kommunen til å gi planen status som kommunedelplan, for å gi innhaldet i planen tilstrekkeleg fagleg og politisk tyngde til oppfølging og gjennomføring. Det går fram av dei statlege planretningslinjene at klimaplanen bør ha eit handlingsprogram som viser ansvarsfordeling for oppfølging. Det er bra at kommunen vil utarbeide klimamål som del av planen.

Arealplanlegginga er sentral i arbeidet med å nå nasjonale klimamål, der ivaretaking av viktige naturområde og artar er avgjerande for å sikre økosystemtenester. Det er viktig å ikkje omdisponere karbonrike areal, både ut frå utsleppsreduksjon og klimatilpassing. Vi viser til krav i dei statlege planretningslinjene om å vurdere bruk av naturbaserte løysingar i arbeidet med klimatilpassing. Kommunen må vektleggje samanhengen mellom utbyggingsmønster og klima. Vi vil elles viser til at utslepp frå landbruk bør få plass i arbeidet med planen. Det er og viktig å sjå samanhengen mellom klima-arbeidet og folkehelse, og planen vil difor ha relevans både for samfunnstryggleik og gode oppvekst- og levekår for befolkninga.

Austrheim kommune sin kommentar: Austrheim kommune har i stor grad teke med innspela frå Statsforvaltaren i Vestland til følgje i dette planarbeidet. Austrheim kommune har vald å gje denne planen status som kommunedelplan, dette for å gi innhaldet i planen tilstrekkeleg fagleg og politisk tyngde til oppfølging og gjennomføring. Ordførar har vore med i arbeidsgruppa for dette arbeidet, planen er såleis godt forankra politisk. Kommunestyret har vedteke klimamålet for Austrheim kommune, dette er eit ambisiøst mål for utsleppsreduksjon. Austrheim kommune har i dette planarbeidet vektlagt samspelet mellom klimamål, arealbruk, naturmangfald og klimatilpassing.

Økonomiske ressursar har gjort at klimabudsjett/klimrekneskap ikkje er laga, men tal/oversikt frå Miljødirektoratet er henta inn for Austrheim kommune. Det viktigaste no er handling for å redusera klimagassutsleppa og aktivt tilpassa oss klimaendringane så fort og godt som me kan.

Kommunestyret sitt vedtak den 11.11.2021 om klimamål følgde opp Vestland fylke sine målsetjingar på ein god måte. Kommunedirektøren og dei tre kommunalsjefane innafor sine område er hovudansvarleg for gjennomføring av tiltak etter denne kommunedelplanen. Når planen vert godkjent vert det naturleg å drøfta prioritering av tiltak i kommunedelplanen ut frå kostnader og tilskotsordningar. Austrheim kommune var på ROBES-lista ut i 2021, og me må prioritera kostnader og investeringar på ein fornuftig måte framover. Statlege tilskotsordningar og initiativ infor dette arbeidet vil uansett Austrheim kommune følgja aktivt opp framover. Kommunen vil ha ein praktisk og framtidsretta tilnærming til dette viktige arbeidet. Miljøsertifiseringa av Austrheim kommune som starta i 2021 og som pågår vil og vera styrande for prioriteringar av tiltak framover. Kommunedelplanen har med seg eit handlingsprogram, tiltak som utløyser utgifter skal innarbeidast i økonomiplanen. Austrheim kommune tek elles innspelet til Statsforvaltaren til orientering.

4. Naturvernforbundet Nordhordland sitt innspel er datert den 19.05.2021 (forkorta):

Myr som karbonlager og potensielle klimagassutslepp ved nedbygging må kartleggjast og bereknast og få ein sentral plass i karbonrekneskapen til kommunen. I forhold til andre kommunar, har Austrheim mykje myr. Det må vera ei målsetting i planen om å unngå nedbygging av myr til landbruks- og næringsføremål, jfr. Miljødirektoratet si innstraming.

Fortetting av bustadbygging rundt sentra på Fønnes og Mastrevik vil redusera behovet for bilkøyring og leggja til rette for meir sykkel og gange. Samtidig må Austrheim kommune tilstreba ein mest mogleg desentralisert tenestestruktur slik at nærservicetilbod vert oppretthaldne der folk bur. Også det vil føra til mindre bilbruk og lågare klimagassutslepp. Fortetting og gode nærservicetilbod betingar tilrettelegging med gang- og sykkelveggar og trafikkisikringstiltak, mellom anna fartsreducerande tiltak. Talet på ladepunkt må halda tritt med auken i el-bilar, både privat og kommunalt. Kommunen må byrja å planlegga for hydrogen som drivstoff. Meir kollektivbruk er ved sidan av sykkel og gange ein effektiv måte å få ned klimagassutsleppa på. Med ny veg over Radøy bør kommunen arbeida for eit ringbussystem mellom Austrheim og Knarvik over Lindås og Radøy, ikkje minst fordi vegen over Radøy vil ha den kortaste reisetida til og frå Fosnøy og kommunesenteret i Mastrevik. Rutefrekvensane bør dessutan aukast, og takstane haldast på dagens nivå.

Austrheim bør bli ein føregangskommune med solenergi frå sine bygg og bør oppfordra private bedrifter og husstandar til å gjera det same. Ein slik småskala kraftutbygging vil koste lite på lang sikt. Kommunen har svært mange soltimar pr. år. Den kommunale bilparken bør vera fullelektrifisert innan 2025. Hydrogen kan vera eit alternativ.

Austrheim kommune sin kommentar: Austrheim kommune har i stor grad teke med innspela frå Naturvernforbundet til følgje i dette planarbeidet. Potensielle klimagassutslepp ved nedbygging vil framover verta kartlagt og talfesta i reguleringsplanarbeidet, der det er avgjort at slike område skal nyttast til utbyggingar i kommuneplanen sin arealdel. Å unngå å byggja ned myr- og våtmarksområde er tema i denne kommunedelplanen. Fortetting, aukt kollektivsatsing, fleire gang- og sykkelveggar, desentralisert tenestestruktur, fleire ladepunkt og el-bilar og bruk av solenergi er viktige tema i planen som no skal på offentleg ettersyn. Det viktigaste no er handling for å redusera klimagassutsleppa, men og aktivt tilpassa oss klimaendringane som kjem framover. Austrheim kommune tek elles innspelet til orientering.

Klimamål for Austrheim kommune

I kommunestyret i Austrheim vart det i møte den 11.11.2021 vedteke i sak 082/21 følgjande klimamål for kommunen. Vedtaket var:

Kommunestyret har som klimamål at Austrheim kommune i 2030 skal vera utleppsfri, i år 2050 ein 1,5- graderskommune. Austrheim kommune skal vera ambisiøs i si satsing framover på alternative energikjelder som fjordvarme, varmepumper og solenergi. Det gjeld og satsing på gang- og sykkelveggar og tiltak innafør friluftsliv, idrett og kultur som fremjar folkehelsa og minkar klimautsleppa i kommunen.

Kommunestyret i Austrheim har såleis kome med eit klårt politisk klimamål for dette planarbeidet. Dette målet har vore førande i arbeidet med kommunedelplanen for klima og energi. Planen omfattar både direkte og indirekte klimagassutslepp, og set mål for kommunen som organisasjon og samfunn, den skal vise retningen for klimaarbeidet vårt. Det vert og lettare å få tilgong til offentlege tilskot til klima- og energiomlegging om kommunen vår har ein oppdatert plan. Til dømes kan ein då truleg få økonomisk bistand til å få på plass ein rimlegare og miljøvenleg oppvarming av kommunehuset. Solenergi og små vindturbinar i kombinasjon med bruk av geovarme eller varme frå sjøen, vil kunne gje oss miljøvenlege energiløysingar til dei kommunale byggja våre framover.

Parisavtalen vart vedtatt 12. desember 2015, det er den første rettsleg bindande klimaavtalen med reell global deltaking. Norge skal mellom anna vera karbonnøytralt i 2050. I 2017 vart lova om klimamål (klimalova) vedtatt på Stortinget, den tredje i kraft den 1. januar 2018. Den 08.01.2021 la Regjeringa fram Meld. St. 13 (2020–2021) om Klimaplan for 2021-2030. Den oppdaterer Norges mål om utsleppsreduksjon. Regjeringa sine ambisjonar om til dømes utsleppsfrie lette kjøretøy kjem klårt fram her. FN sine 17 berekraftmål, som Norge har slutta seg til, skal vera det politiske hovudsporet for å ta tak i vår tid sine største utfordringar.

Det å få redusert kommunen sine indirekte og direkte utslepp av klimagassar og sikra meir effektiv energibruk og få til miljøvennleg energiomlegging har vore sentralt i dette planarbeidet. Planen viser kva mål og ambisjonar kommunen har for temaet, og kva tiltak som skal/bør gjennomførast. Til dømes kan me utgreiia om det er fornuftig økonomisk og berekraftig å innstalera solceller på kommunale bygg og tak.

Planarbeidet har teke utgangspunkt i den statlege planretningslinja for klima- og energiplanlegging i kommunene. Kommunane i Norge har viktig rolle og verkemiddel i sektorar som står for omtrent halvparten av norske klimagassutslipp. Komundelplanen for klima og energi vil leggja grunnlaget for målretta gjennomføring og val av tiltak, investeringar og prosjekt i kommunen. Gjennom planen er det lagt føringar for ynskt utvikling innan innkjøp, bygging og drift av kommunale bygg og anlegg, og for kva tiltak som kan og bør gjennomførast.

Klimatilpassing har vore eit viktig tema i dette arbeidet. Varsla klimaendringar skjerpar krava til fornuftig arealbruk og langsiktig planlegging. Høgare temperatur og ikkje minst hyppigare tilfelle av kraftig nedbør vil gje auka førekomst av flaum, skadar og erosjon. Dette kan og redusera kvaliteten på drikkevatnet vårt framover. Klimaframskrivingar har vore sentralt i planarbeidet, det gjeld både havnivåstigning og fare for stormflo. Tørkeperiodar kan og gje meir fare for storbrannar og dårlegare vilkår for landbruket, men lengre vekstsesong med eit varmare klima kan og gi fordelar. I planen har førebygging av utmarksbrann hatt høg prioritet. Pandemi- og sjukdomar kan og auka med klimaendringar. Ei av dei store utfordringane i verda i dag er alle arealtapa (leveområde redusert) for plante,- fugle- og dyrelivet vårt. Det biologiske mangfaldet i verda vert ramma hardt. Det går og ut over naturen si naturlege evne til å binda karbon. Nedbygging av natur aukar og risiko for skade av

klimaendringane på menneske.

Klimaendringar og tap av biologisk mangfold er definert som dei største globale miljøproblema. Mange artar vil dø ut som følgje av klimaendringane. Det å avgrensa klimaendringane gjennom utsleppsreduksjon av klimagassar er såleis eit viktig tiltak for å ta vare på det biologiske mangfaldet. Klimarettferd vil verta eit viktig tema globalt framover.

Det grønne skiftet må koma raskere og meir omfattande viser den nye rapporten frå FN som kom ut i februar 2022, det er ikkje lenger nok å berre kutta utslepp. Dette er konklusjonen i Delrapport 2: **Virkningar, klimatilpassing og sårbarhet fra FNs klimapanel (IPCC)**. Mellom 3,3 og 3,6 milliarder menneske lever i dag under tilhøve som gjer dei svært sårbare for endringane i klima. Alt i dag ved ein oppvarming på 1,1 grader ser me store konsekvensar på økosystem i alle regionar, både på land og i havet. FNs klimapanel vil i april 2022 koma med Delrapport 3, den vil handla om korleis me kan kutta i klimagassutslepp.

Vurdering:

Kommunedirektøren synes det var positivt at kommunestyret i Austrheim den 11.11.2021 kom med eit klårt politisk klimamål for kommunen. Dette vedtaket har vore førande i arbeidet med kommunedelplanen for klima og energi. Kommunedirektøren synes det er viktig at Austrheim kommune skal ha klima- og miljømessig berekraft framover. Det er eit samfunn som tek overordna miljøomsyn, sikrar miljø- og naturressursar mot nedbygging og ureining, og bidreg til å redusera og førebygga klimaendringar. Det å stoppe klimaendringane er også eit av FNs 17 berekraftsmål.

For å nå 1,5- gradersmålet må utsleppa reduserast med omtrent 50 % innan 2030 og vidare mot 100 % i 2050. Å få ein meir effektiv energibruk og miljøvennleg energiomlegging vil kunne vera positiv for økonomien i kommunen vår. Enova og andre instansar kan ein og søkje om støtte frå om kommunen har ein god og ambisiøs kommunedelplan for klima og energi. Arbeidet med miljøsertifisering av kommunen starta opp i 2021 og går vidare i 2022 og 2023, det er mange fordelar at dette arbeidet pågår samstundes.

Kommunedirektøren vil peika på at han og dei tre kommunalsjefane innafor sine område er ansvarleg for gjennomføring av tiltak etter denne kommunedelplanen. Når planen vert godkjent vert det naturleg å drøfta prioritering av tiltak i kommunedelplanen, ut frå kostnader og tilskotsordningar. Økonomien til Austrheim kommune framover som var på ROBEK-lista fram til 2021 spelar og inn her. Kommunedelplanen har med handlingsprogram, det vil vera førande for vårt arbeid framover, tiltak som utløyser utgifter skal innarbeidast i økonomiplanen.

Kommunedirektøren vil peika på at Austrheim kommune, som alle andre kommunar må ta sin del av klimaansvaret, og me må planleggja for å verta eit tilnærma utsleppsfritt samfunn på sikt. Det kan vera positivt for folkehelsa, men og for lokal produksjon av mat og andre varer/tenester og kulturlivet å ha eit ambisiøst klimamål. Austrheim kommune må leggje FN sine berekraftsmål til grunn for planen. Statlege planretningslinjer for klima- energi og klimatilpassing er det mest sentrale dokumentet når det gjeld nasjonale føringar for klimaarbeidet. Arealplanlegginga er sentral i arbeidet med å nå nasjonale klimamål, der ivaretaking av viktige naturområde og artar er avgjerande for å

sikre økosystemtenester.

Sjøfart står for ein stor del av verda sine klimautslepp. Landbruk, vegtrafikk og oppvarming er og store kjelder. Forbruket vårt gjev store klimautslepp globalt, mykje av dette er produsert og transportert over heile verda før dei kjem til kunden/oss. Vestland fylke har uttalt at dei skal vere ein pådrivar for klimaomstilling og nullutslepp innan 2030. Kommunedirektøren meiner at det er rett at Austrheim kommune og skal vera ambisiøs i si satsing framover. Me bør mellom anna satsa på alternative energikjelder som fjordvarme, varmepumper og solenergi. Me må søka aktivt på tilgjengeleg støtteordningar for enøktiltak og berekraftig energiproduksjon. Bygging av fleire gang- og sykkelvegar og tiltak innanfor friluftsliv, idrett og kultur som fremjar folkehelsa og minkar klimautsleppa i kommunen skal prioriterast. Med eit rikt og allsidig idrett, rekreasjon- og kulturliv i Austrheim kommune vil innbygjarane våre kunne ha gode lokale tilbod.

Kommunedirektøren vil peika at alle må bidra aktivt i den største dugnaden verda vår no treng, det har. **FNs klimapanel (IPCC) sin Delrapport 1** viser også klart at klimaendringane går raskare enn kva ein har konkludert med tidlegare. I FNs klimapanel sin Delrapport 2 vert dette følgd opp med å understreka at me må handla no, det haster med å få tilpassingar på plass, og desse må vera kraftigare enn det me har tenkt fram til no. God lokalkunnskap er viktig i arbeid med klimatilpassing.

Kommunedirektøren synes difor er viktig at klimatilpassing har vore eit viktig tema i dette planarbeidet. Varsla klimaendringar skjerpar og krava til fornuftig arealbruk og langsiktig planlegging. Det er og viktig å ha ein god beredskap, men og førebyggja skade som kan koma av klimaendringar, dette kan vera fare for utmarksbrannar mot hus/infrastruktur og skadar som kan koma frå til dømes stormflo. Førebygging er rimlegare og betre enn reparasjon. Gode føresegnar i planar vil og kunne redusera faren for skade på tiltak/bygg framover på grunn av forventta havnivåstigninga. *Planlegging og utbygging skal utførast slik at bygg og anlegg ikkje tek skade av høg vasstand og stormflo (kote + 3 moh.),* det står og som føresegn i kommuneplanen sin arealdel som vart godkjent den 11.04.2019.

Kommunedirektøren meiner at alle kommunar må bidra aktivt i den største dugnaden verda vår no treng, det har. Klimaarbeid er ikkje lenger eit oppdrag for eldsjelene, dette er eit leiaransvar og då sjølvstøtt eit politisk ansvar. Alle ansvarlege skal kunne svare på desse spørsmåla: *Bidreg dette tiltaket, vedtaket eller prosjektet til ei klimaomstilling? Bidreg dette tiltaket til auka eller reduserte klimagassutslepp? Bidreg dette tiltaket og vedtaket til ein god klimatilpassing?*

Kommunedirektøren rår med dette til at Austrheim kommune legg Kommunedelplan for klima og energi for Austrheim kommune 2022-2032 ut på offentleg ettersyn.

Konklusjon:

Kommunedelplan for klima og energi for Austrheim kommune 2022-2032 vert lagt ut på offentleg ettersyn.